

施愚山先生余文集

施愚山先生全集

施愚山先生全集

施愚山先生全集

施愚山先生學餘文集卷之二十一

墓志銘

奉政大夫晉府左長史張公墓志銘

山陰張君荀仲與余叔父善因從其游徵其家世向往其尊大夫長史公長史公歿弔其家用是知公益詳閱十有七年荀仲來請銘予拜受教曰固所願執事也公諱鎡字孔時在宋忠定公詠家濮陽其四世孫伯義以御史言事謫尉山陰遂家焉明成化間高祖以弘曾祖景琦並官于朝坐抗直左遷祖官至都察院右副都御史巡撫江西諱元冲考官江西右布政使諱一坤後先稱理學巡撫公尤顯嘗受業王文成學者稱浮峰先生

自明以來凡四世貴顯皆名進士公胚胎仁義不繩自
直聞浮峰公誦說文成心慕之年十五補諸生再中副
榜終不利用恩貢受晉王府左長史王故賢者公日進
其所學論政治得失古今人臧否六籍同異嘔心奮舌
澄源塞流懃懇畢至王世子以下奉之有加禮流及國
人賢士大夫爭來學嘗與門人郊遊賦詩慕者至繪圖
傳其事王薨乃歸道作我思王十章讀者出涕是時劉
公宗周陶公奭齡講學陽明書院公與之左右片言必
錄所著就正編劉公亟稱之其未爲長史時連居父母
憂號慟得嘔血疾至是遷葬浮峰公墓去舍里許日三
四往如是匝月遂疾作崇禎癸未四月二十日卒年八

十有二公嘗言道之不明壞於文人役志主司工揣摩
苟得當爲幸賢者茅靡背道毀方至不可救止故矯自
樹立大奮于學而及其與人油然善也門人私諡曰正
學先生配章氏潮州推官崑岡公女封宜人嘗侍其姑
胡夫人病癰不解衣兩月中外多其賢年七十先長史
公卒合葬秦望山之麓有子二人長灝邑庠生次淑太
學生女二人孫五人曾孫七人以儒世其家淑字荀仲
工文詞所與游多賢豪用能闡其先人之行者也銘曰
維張四世賢且昌顏堂閔構澤未央有懿正學特珪璋
稽山琢石垂無疆

故藍山縣知縣侯君墓志銘

同邑侯君韓振知衡州藍山縣以順治壬辰秋歿于官
旣八年庚子其友施閏章返自山左立石於墓曰嗟乎
韓振君不幸以進士速歿命也吾復何言然藍山之人
皆垂涕衡南之士大夫皆歎嗟鄉閭之不識者皆歛歔
詫惜以善人爲不祥於乎人之所與天或怒之鬼或嫉
之矣吾何忍亾一言君諱振世字韓振先世耕且讀父
三垣力善積學老困舉子業以口授君君警朗多才藝
號能文章與余同榜登進士痛自飭謹不敢出一語先
人時湖南寇大擾而藍山衡州之南偏賊夷其城殆盡
縣令接踵歿君至之日城中老弱數十家戍卒二十人
皆鳥獸震駭君請城不許請益兵又不許乃誓歿守期

會征斂以時民德之賊將至里老夜告急迎脫其妻子而君以不能禦賊免官轉側湘潭爲亂兵所害年三十妻馮氏許氏皆未有子一子魯生出側室某氏卽脫難歸自賊中者也君兄弟三人田產千金以君仕耗費寡稚凍飢奴僕無留者歲餘弟振倫始往湘南裹骨歸葬於故居之側於乎君少余四歲兄事余最懽愛予文辭余遇事疏畧君纖悉必記亡遺忘自謂慎當不敗而卒以然旣將視其孤且哀之以銘銘曰
以官往以骨歸九疑之麓湘水之湄招魂而葬兮是邪非

封給事中蔣公暨太安人韓氏墓志銘

蔣氏在宋元豐間遠祖文忠公之奇觀文殿學士其後
自義興徙金壇又十數傳生封給事公諱應祿字子亨
爲德於鄉號曰芝田翁先世孝弟力田公始好儒術生
僉事君少慧自束髮及補諸生無日不多方督其學比
成進士自台州推官入爲給事中遷山東按察司僉事
無日不教以廉平使問民疾苦其與人自少至老無日
不敦樸自下旣封于朝徒步城市間遇所知必握手語
有召必赴有急必周卒之日春秋八十四疏逃皆垂涕
公兄弟五人公最少失父異母兄分予壞宅公葺而安
之念無以將母棄儒而農獨奉洗腆外大父韓翁罹仇
獄陰寄公百金已而暴卒公謂匿金不祥還其家封識

如故歲乙酉江南盜起亡命相煽掠公盡所有事平吏
爲捕治公堅置不問娶韓氏與公共艱苦凡公所爲善
必助之力鄰接婦亡蚊帷撤已帷遺之操作奉姑無少
懈姑所遺瓶盎几杖寶之終身如一日就養台州敝篋
敗縷瑣細百具皆齎行謂老婦朝夕須此毋爲台民累
居數年不取一帛旣歸台之吏民有持金數千里爲壽
者悉却去平生深識大體類偉男子僉事君之子復爲
翰林院脩撰畧不驚喜誠之曰士而宦如女字夫但作
得一好人爲可喜耳初封孺人累封太安人與封公偕
老貴壽且康以順治庚子十二月卒春秋八十五子僉
事君諱鳴玉明丁丑進士孫二長曰超順治丁亥進士

第三人以文辭行誼名天下次曰進女孫二曾孫一顯祖芝田公事既具大學士兩陳公誌傳中而太安人後終脩撰再拜屬銘故誌其軼事銘曰

疇士而農孝養是供維德是崇用啓其宗淑人作配曰勤與惠維德不二慶流於世琢石納銘維固維寧千秋萬禩維德馨

資深汪公墓志銘

元至正末吾鄉禮部尚書譙國郡公文節汪先生諱澤民以家居殉國難子別駕用敬舍人用和痛哭不食相繼歿汪氏遂世以忠孝聞凡十傳而爲處士公資深諱逢原吾同年友湘鄉縣令觀孝廉燦之父也少挺志槩

而恥爲嶄巖執謙養醇里中稱長者二子旣貴不少變
曰吾豈以兒輩一第重哉所居陽坡山與敬亭相望日
以孝友篤其家子孫益衆乃置宅城北徒步往來手種
梧竹以自娛樂賓客貴人間從其子游者求通謁爲壽
輒謝不見郡縣行鄉飲禮固請詣賓筵公掉頭曰若強
我則南山之南矣配曰周孺人謹儉而慈相勗爲善先
公卒未幾又聞湘鄉訃鬱鬱不懌遂以考終公襁褓而
孤祖父母又連歿拮据讀書不得志及長子觀十歲能
文卽不就制舉曰是在吾子又命其次子銓燦輩次第
受業伯氏拜跪如師弟子禮觀燦旣並舉於鄉又皆出
富平田先生門公燄然亾喜色及長公成進士知湘鄉

縣公若以爲憂迎養不往手勒居官十二則以示之旣而湘鄉多惠政以聞母訃哀慟卒於官湘人爲之俎豆公歎曰兒死能得民死忺矣初文節公祠燬公亟新之曰君子將營宮室必先宗廟也其上世故籍婺源學士藻公以文鳴於宋勅賜祀田一區文節公增置若干代久浸沒公命二子清復勒石母蘇氏苦節未聞于朝念之輒淚下其敦本尚孝如此公年七十有五生萬曆戊子六月二十六日終康熙壬寅八月二十六日配周氏生萬曆己丑五月十九日終順治己亥九月二十六日得年七十有一某年月日葬某山之原子四人長觀乙未進士知湘鄉縣次銓郡諸生次燦丙戌舉人次炯

郡諸生孫六人紹隆紹霖並郡邑諸生紹洪紹楫紹陞
紹裕俱有才質孫女三曾孫女二聘字皆巨族始周孺
人孝其姑蘇氏姑且歿訣曰願冥訴于神使汝多賢子
婦以相報云於乎汪氏世系文節公以前詳宋濂溪碑
銘湘鄉兄弟行業茲不具書銘曰

汪肇唐葉丕顯宋元忠孝懿節萃厥一門猗與處士匪
惟子貴亶有令聞是將式穀其後以無忝文節之子孫
陸處士墓志銘

吾里有陸舒白先生頤而髯賢而有文當領歲薦會亂
棄不就其子之瑜有父風尤好爲詩予交陸氏父子而
未獲知其先世聞里中父老相傳有陸孝子不能舉其

名問之瑜則戚然曰此先大父省我公也已而舒白卜
葬公於某山之原出俞子所爲傳請志銘嗟乎章雖不
及見公旣聞其行事敢不識其大者公弱冠爲諸生束
身向學采經擷史用張其文詞試則屢困以授業生徒
終其身公之志不大遂然平生藉脩脯爲養未嘗有戚
容晚築一茅舍雜植蔬果手鋤盜灌園客至摘蔬薦尊
簋談笑不倦少病羸治導引之術旣耄而視聽不衰齒
能噬乾腊卒之日年八十有六其訓諸弟子茹實吐華
弟子皆嚴憚之人有過則微詞曉譬使人人自解會國
變士多佯狂憤世亾窮山峻谷中或以事扞法公笑曰
若將馭義和遊於廣漠之野乎抑曳尾泥中猶視息人

間世乎胡爲是揭揭者公之父諱敘嘗疾篤刲股藥之
獲甦有醴粥田數畝析產之日悉讓其兄郡守金公礪
崇尚風教故嘗建高齋延先大父允升公講學者也聞
其事上之提學御史以孝子旌其門故至今里中人稱
陸孝子云子二長履中次諸生履素卽舒白孫三人長
曰之瑜餘並幼人皆謂孝子德厚其發當必太公諱可
宗省我其字娶施氏勤苦相賓子從祖姑也銘曰
陸氏三世皆窮于儒喟此孝子虧體若愚生以名其閭
歿以光其幽墟於乎展如之愚兮我淚漣如

前孝廉張穉青先生墓志銘

往歲辛丑識武林張子祖望於湖墅告余曰先子久棄

不孝孤願有銘以葬會予赴官豫章不果作丁巳秋再過武林張子亟以狀請蓋別去十七年矣張子以文辭稱又所游多賢豪能言者顧獨遲十許年惟予是徵於乎余何敢不銘公諱光球字穉青別號志林明萬曆丁酉舉人福安知縣諱蔚然之子戊戌進士都察院右僉都御史諱應禎之孫也兄弟凡五人公於次居三力學善文辭杭之士莫能先焉補山陰縣學弟子員山陰之士亦莫能先也顧自奮曰此不足爲學也時有福定公高弟陳存之從事理學公復游其門而爲文日進崇禎癸酉舉浙江鄉試第五人以數奇連上公車中副榜終以不第年四十三崇禎壬午九月二日卒公爲人孝友

忼爽有智畧始昏從父官福安署後樟樹大數十圍其
土神號靈異犯者輒歿母夫人偶過樹下暴病卒人皆
謂樹祟也公大號哭禡神衣冠而數之欲毀其祠人皆
爲公懼公扶櫬歷險度仙霞嶺歸竟亾事福安公晚病
肺徹曙坐公侍側常數十夕不倦及居父喪廬墓孤山
臥起衰絰是時伯兄壘已登鄉薦仲兄塔拔明經而垓
壇兩弱弟方在襁褓公遽請於兄以父田宅盡歸之兩
弟且匡其不逮一時兄弟之子如絡孫弘孫輩公手口
指畫使工爲文章從弟中發貧其公強致之授館餐遂
舉於鄉由是人人奮起諸子弟亾論售不售炳炳輩立
用張一軍皆公力也公旣領袖後進士多依以成聲門